

欽定後漢書

卷一百一十
三十一

後漢書卷一百十一

宋

宣

城

太

守范

曄撰

唐

章

懷

太

子

賢注

獨行列傳第七十一

孔子曰與其不得中庸必也狂狷乎

庸常也中和可常行之道謂之中庸

言若不得中庸之人與之居必也須得狂狷之人

又云狂者進取狷者有所不

爲也

此是錄論語者因夫子之言而釋狂狷之人也

此蓋失於周全之道而取

諸偏至之端者也然則有所不爲亦將有所必爲者矣

旣云進取亦將有所不取者矣如此性尙分流爲否異

適矣

人之好尙不同或爲或否各有所適

中世偏行一介之夫能成名立

方者蓋亦衆也或志剛金石而剋扞於強禦

謂劉茂衛福也

或

意嚴冬霜而甘心於小諒

戴就陸續也

亦有結朋協好幽明

共心

范式張劭也

蹈義陵險死生等節

繆彤李善也

雖事非通圓

良其風軌有足懷者而情迹殊雜難爲條品片辭特趣

不足區別措之則事或有遺

措置也

載之則貫序無統以

其名體雖殊而操行俱絕故總爲獨行篇焉庶備諸闕

文紀志漏脫云爾

譙玄傳

譙玄字君黃巴郡閬中人也少好學能說易春秋仕於州郡成帝永始二年有日食之災乃詔舉敦樸遜讓有

行義者各一人州舉立詣公車對策高第拜議郎帝始

作期門數爲微行

前書武帝微行常與侍中常侍武騎及待詔北地良家子能騎射者期諸

殿門故有期門之號自此始也成帝微行亦然故言始也

立趙飛燕爲皇后后專寵

懷忌皇太子多橫天折立上書諫曰臣聞王者承天繼

宗統極保業延祚莫急胤嗣故易有幹蠱之義詩詠衆

多之福

易曰幹父之蠱注云蠱事也毛詩曰螽斯后妃之德也后妃不妬忌則子孫衆多也其詩曰螽

斯羽詵詵兮宜爾子孫振振兮

今陛下聖嗣未立天下屬望而不惟社

稷之計專念微行之事愛幸用於所惑曲意留於非正

竊聞後宮皇子產而不育

前書成帝宮人曹偉能及許美人皆生子趙昭儀皆令殺

之

臣聞之怛然痛心傷剝竊懷憂國不忘須臾夫警衛

不脩則患生非常忽有醉酒狂夫分爭道路既無尊嚴之儀豈識上下之別此爲胡狄起於轂下而賊亂發於左右也願陛下念天下之至重愛金玉之身均九女之施

九女解見崔琦傳

存無窮之福天下幸甚時數有災異立輒

陳其變既不省納故久稽卽官後遷太常丞以弟服去職平帝元始元年日食又詔公卿舉敦朴直言大鴻臚左咸舉立詣公車對策復拜議郎遷中散大夫四年選明達政事能班化風俗者八人時並舉立爲繡衣使者

前書御史大夫領繡衣直指出討姦猾理大獄武帝所制不常置

持節與太僕任惲等

分行天下觀覽風俗所至專行誅賞事未及終而王莽

居攝玄於是縱

縱舍也

使者車變易姓名間竄歸家

間私也

因以隱遁後公孫述僭號於蜀連聘不詣述乃遣使者備禮徵之若玄不肯起便賜以毒藥太守乃自齎璽書至玄廬曰君高節已著朝廷垂意誠不宜復辭自招凶禍玄仰天歎曰唐堯大聖許由耻仕周武至德伯夷守餓彼獨何人我亦何人保志全高死亦奚恨遂受毒藥玄子瑛泣血叩頭於太守曰方今國家東有嚴敵兵師四出國用軍資或不常充足願奉家錢千萬以贖父死太守爲請述聽許之玄遂隱藏田野終述之世時兵戈累年莫能脩尙學業玄獨訓諸子勤習經書建武十一

年卒明年天下平定立弟慶以狀詣闕自陳光武美之策詔本郡祠以中牢勅所在還立家錢時亦有犍爲費貽不肯仕述

○劉攽曰案文亦字乃合在不字上

乃漆身爲厲陽狂以避

之退藏山藪十餘年述破後仕至合浦太守瑛善說易

以授顯宗爲北宮衛士令

漢官儀曰北宮衛士令一人秩六百石

李業傳

李業字巨游廣漢梓潼人也少有志操介特習魯詩師

博士許晃元始中舉明經除爲郎

元始平帝年也

會王莽居攝

業以病去官杜門不應州郡之命太守劉咸強召之業

乃載病詣門咸怒出教曰賢者不避害譬猶設弩射市

薄命者先死聞業名稱故欲與之爲治而反託疾乎令

詣獄養病欲殺之客有說咸曰趙殺鳴犢孔子臨河而

逝史記曰孔子既不得用於衛將西見趙簡子至於河而聞賈鳴犢舜華之死也臨河而歎曰美哉河水洋洋乎丘之不濟命也夫子貢進曰敢問何謂也孔子曰

賈鳴犢舜華晉國之賢大夫也趙簡子未得志之時須此兩人而後從政丘聞之也刳胎殺夭則騏驎不至竭

澤而漁則蛟龍不合覆巢毀卵則鳳凰不翔何則君子諱傷其類夫鳥獸之於不義也

尚知避之而况乎丘哉乃還也未聞求賢而脅以牢獄

者也咸乃出之因舉方正王莽以業爲酒士王莽時官酤酒故置

也酒士病不之官遂隱藏山谷絕匿名迹終莽之世及公

孫述僭號素聞業賢徵之欲以爲博士業固疾不起數

年述羞不致之乃使大鴻臚尹融持毒酒奉詔命以劫

業若起則受公侯之位不起賜之以藥融譬旨曰方今天下分崩孰知是非而以區區之身試於不測之淵乎朝廷貪慕名德曠官缺位子今七年四時珍御不以忘君宜上奉知己下爲子孫身名俱全不亦優乎今數年不起猜疑寇心凶禍立加非計之得者也業乃歎曰危國不入亂國不居

論語孔子曰危邦不入亂邦不居天下有道則見無道則隱

親於

其身爲不善者義所不從君子見危授命

論語曰親於其身爲不善

者君子不入又曰君子見危授命見得思義

何乃誘以高位重餌哉融見業

辭志不屈復曰宜呼室家計之業曰以丈夫斷之於心久矣何妻子之爲遂飲毒而死述聞業死大驚又耻有

殺賢之名乃遣使弔祠賻贈百匹業子輦逃辭不受蜀
平光武下詔表其閭益部紀載其高節圖畫形象初平
帝時蜀郡王皓爲美陽令王嘉爲郎王莽篡位並棄官
西歸及公孫述稱帝遣使徵皓嘉恐不至遂先繫其妻
子使者謂嘉曰速裝妻子可全對曰犬馬猶識主況於
人乎王皓先自刎以首付使者述怒遂誅皓家屬王嘉
聞而歎之曰後之哉乃對使者伏劍而死是時犍爲任
永及業同郡馮信並好學博古公孫述連徵命待以高
位皆託青盲以避世難永妻淫於前匿情無言見子入
井忍而不救信侍婢亦對信姦通及聞述誅皆盥洗更

視曰世適平目卽清淫者自殺光武聞而徵之並會病卒

劉茂傳

劉茂字子衛太原晉陽人也少孤獨與母居家貧以筋力致養孝行著於鄉里及長能習禮經教授常數百人哀帝時察孝廉再遷五原屬國侯遭母憂去官服竟後爲沮陽令

沮陽縣屬上谷郡故城在今媯州東沮音阻

會王莽篡位茂棄官

避世弘農山中教授建武二年歸爲郡門下掾時赤眉二十餘萬衆攻郡縣殺長吏及府掾史茂負太守孫福踰牆藏空穴中得免其暮俱奔孟縣

今并州孟縣也

晝則逃隱

夜求糧食積百餘日賊去乃得歸府明年詔書求天下
義士福言茂曰臣前爲赤眉所攻吏民壞亂奔走趣山
臣爲賊所圍命如絲髮賴茂負臣踰城出保孟縣茂與
弟觸冒兵刃緣山負食臣及妻子得度死命節義尤高
宜蒙表擢以厲義士詔書卽徵茂拜議郎遷宗正丞

續漢

書宗正丞一人比千石也

後拜侍中卒官元初中鮮卑數百餘騎寇

漁陽太守張顯率吏士追出塞遙望虜營烟火急趣之
兵馬掾嚴授慮有伏兵苦諫止不聽顯賊令進授不獲
已前戰伏兵發授身被十創歿於陣顯拔刃追散兵不
能制虜射中顯主簿衛福功曹徐咸遽赴之顯遂墮馬

福以身擁蔽虜并殺之朝廷愍授等節詔書褒歎厚加
賞賜各除子一人爲郎中永初二年劇賊畢豪等入平
原界縣令劉雄將吏士乘船追之至厭次河厭次縣之河也與
賊合戰雄敗執雄以矛刺之時小吏所輔所姓也風俗通曰宋大夫
雄而刺輔貫心洞背卽死東郡太守捕得豪等具以狀
上詔書追傷之賜錢二十萬除父奉爲郎中

溫序傳

溫序字次房太原祁人也仕州從事建武二年騎都尉
弓里戌弓里姓也將兵平定北州到太原歷訪英俊大人問

以策謀成見序奇之上疏薦焉於是徵爲侍御史遷武陵都尉病免官六年拜謁者遷護羌校尉序行部至襄武爲隗囂別將苟宇所拘劫宇謂序曰子若與我并威同力天下可圖也序曰受國重任分當效死義不貪生苟背恩德宇等復曉譬之序素有氣力大怒叱宇等曰虜何敢迫脇漢將因以節撾殺數人賊衆爭欲殺之宇止之曰此義士死節可賜以劒序受劒銜鬚於口顧左右曰旣爲賊所迫殺無令鬚汙土遂伏劒而死序主簿韓遵從事王忠持屍歸斂光武聞而憐之命忠送喪到洛陽賜城傍爲冢地賻穀千斛縑五百匹除三子爲郎

中長子壽服竟爲鄒平侯相夢序告之曰久客思鄉里

壽卽棄官上書乞骸骨歸葬帝許之乃反舊塋焉

序墓在今

并州祁縣西北

彭脩傳

彭脩字子陽會稽毘陵人也

毘陵今常州晉陵縣也吳地記曰本名延陵吳王諸

樊封季札漢改曰毘陵

年十五時父爲郡吏得休

休假

與脩俱歸

道爲盜所劫脩困迫乃拔佩刀前持盜帥曰父辱子死

卿不顧死邪盜相謂曰此童子義士也不宜逼之遂辭

謝而去鄉黨稱其名後仕郡爲功曹時西部都尉宰鼂

行太守事

應劭漢官曰都尉秦官也本名郡尉掌佐太守典其武職秩比二千石孝景時更名都尉

以微過收吳縣獄吏將殺之主簿鍾離意爭諫甚切鼂
怒使收縛意欲案之掾史莫敢諫脩排閣直入拜於庭
曰明府發雷霆於主簿請聞其過鼂曰受教三日初不
奉行廢命不忠豈非過邪脩因拜曰昔任座面折文侯
解見文苑朱雲攀毀欄檻前書成帝時朱雲上書請以
補衡傳之雲攀折殿檻西京自非賢君焉得忠臣今慶明府爲
雜記云攀折玉檻

賢君主簿爲忠臣鼂遂原意罰貰獄吏罪後州辟從事
時賊張子林等數百人作亂郡言州請脩守吳令脩與
太守俱出討賊賊望見車馬競交射之飛矢雨集脩障
扞太守而爲流矢所中死太守得全賊素聞其恩信卽

殺弩中脩者餘悉皆降散言曰自爲彭君故降不爲太守服也

索盧放傳

索盧放字君陽

索盧姓也

東郡人也以尙書教授千餘人初

署郡門下掾更始時使者督行郡國太守有事當就斬刑放前言曰今天下所以苦毒王氏歸心皇漢者實以

聖政寬仁故也而傳車所過未聞恩澤太守受誅誠不

敢言但恐天下惶懼各生疑變夫使功者不如使過

若秦

穆赦孟明而用之霸西戎

願以身代太守之命遂前就斬使者義而

赦之由是顯名建武六年徵爲洛陽令政有能名以病